

Inflatioun – 31.01.2019

1€ ass gläich 1€, 1\$ ass gläich 1\$, 1£ ass gläich 1£, an esou weider. Kléngt bis heihinner richteg a logesch. Natierlech ass 1€, deen ech haut hunn, sou vill wäert wéi en aneren €, deen ech haut hunn. Dëst stëmmt allerdéngs net méi, wann ech 1€, deen ech haut besëtzen, vergläiche mat engem €, deen ech viru 15 Joer hat. 1€, deen ech 2004 hat, ass haut nämlech am Verglach just nach ëm déi 75 Cent wäert. D'Suen huelen also mat der Zäit u Wäert of. Mee firwat ass dat esou?

All Persoun huet eng bestëmmte Kafkraaft, d.h. eng bestëmmten Zomm u Sue fir z.B. Wueren anzekafen. Mee d'Präisser vun de Wueren, déi mir all Dag kafen, sinn net stabil. Wann d'Präisser laangfristeg an d'Luucht ginn, schwätzt ee vun Inflatioun. D'Kafkraaft geet dann erof, well ee mat därselwechter Zomm Sue manner kafe ka wéi virdrun. Fir deem entgéintzewierken, gëtt et zu Lëtzebuerg den Index. Doduerch ginn d'Gehälter an d'Pensiounen un d'Inflatioun ugepasst, esou dass d'Kafkraaft vun de Bierger net duerch d'Inflatioun erofgeet.

D'Inflatioun gëtt an engem Taux, also a Prozent ausgedréckt. Zum Beispill louch den Inflatiounstaux an der EU am Dezember 2018 bei 1,6%. Dat heescht, dass am Duerchschnëtt d'Präisser an der EU an dem Mount ëm 1,6% an d'Luucht gaange sinn.

Op der anerer Säit kënnen déi allgemeng Präisser och erofgoen. Da schwätzt ee vun Deflatioun. An deem Fall ginn d'Sue mat der Zäit net manner wäert, mee méi wäert. Et kann een da mat därselwechter Zomm Sue méi kafe wéi virdrun. Allerdéngs huet d'Deflatioun schlecht Konsequenze fir d'Wirtschaft. Doduerch, dass d'Präisser erof ginn, maachen d'Entreprisë manner Gewënn, wat zu Aarbechtslosegkeet a manner Steiere fir de Staat ka féieren. E Beispill vun Deflatioun ass Japan, wou et an de leschten 20 Joer ëmmer nees laang Deflatiounsperiode gouf.

Allerdéngs ass net nëmmen d'Deflatioun geféierlech fir d'Wirtschaft. Och eng ze héich Inflatioun ka schlecht Konsequenzen hunn. Bei enger héijer Inflatioun verléiert dat Erspuertent nämlech séier u Wäert. D'Bierger an d'Biergerinne riskéiere manner ze spueren oder hir Suen a Wäertsachen z'investéieren. Eng ze héich Inflatioun kann och zu enger sougenannter Loun-Präis-Spiral féieren, wou d'Léin an d'Präisser sech géigesäiteg ëmmer weider an d'Luucht dreiwen.

Fir souwuel eng ze héich Inflatioun wéi och d'Deflatioun ze verhënneren, probéieren d'Staaten d'Wirtschaft mat politeschen Entscheidungen ze steieren. Dofir huet all Währungsraum eng Zentralbank. An der EU këmmert sech z.B. d'Europäesch Zentralbank dorëms, d'Inflatioun ënner 2% ze halen.